



# Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir\_yimyim



tir yimyim

TAPAK 8



**China leniri Iran rara nung mera ajak agia ceasefire alitsü ayongzüker**

**Arsenal UEFA Champions League final-i iogo**

VOL. XXIII ISSUE NO. 203 (ADOK 203) DIMAPUR YANGTEPNÜ (THURSDAY) MONUPII (MAY) 07, 2026

₹ 5.00

## EDTC-i jana tebilemstü lemsateper

**Dimapur, May 6, 2026 (TYO):** Dimapur Municipal Council (DMC)-i designated dumping site shibangba ajanga East Dimapur Town Council (EDTC)-i solid waste endokba nung tayongzükerba aika ajurur.

Iba ajanga sanitation services khen atema anena lir aser jana endokdak ka mangu tashi jana

bendenba anener. Iba tebilemstü khuret ya bangdakpur dangi benogo aser tekaratiba nung angatetteptsü meranger ta EDTC-i metetdaksüogo.

EDTC-isa public, shishilembartem aser rejutem dang khuret angatettsü aser amaliteptsü mepishia metetdaksüogo.

## May 12 nü Assam sorkar akümtsü akok

**Guwahati, May 6, 2026 (Agencies):** May 11, 2026 sülen ang taruba Assam Chief Minister-i tezüngzüktep agitsü ta Chief Minister menden yutsür Himanta Biswa Sarma-i tanü ashi.

Assam nung taruba sorkar tezüngzüktep agiba sentong nung Prime Minister Narendra Modi adentsü jaok saka pa May 11 sülen ang azüngtsü ta PMO nungi osang angazüker.

Assam Assembly elections nung NDA-i takok tulu anguba sülen CM Sarma-i menden toktsüogo.

Taruba Chief Minister-i Council of Ministers tentettsüba atema tatembang lemtet agitsü ta Sarma-i ashi.

Assam Chief Minister Sarma-i Bodbarnü Governor Lakshman Prasad Acharya ket nung Chief Minister menden yutsüba shidi agütsüogo.

Chief Electoral Officer-i Governor Acharya nem election results agütsüba sülen mapang tatsü ka lir Sarma-i CM menden nungi anenba shidi agütsü.

Assam nung National Democratic Alliance (NDA)-i kümsük asemen atongtepa takok tulu nguogo. Parnoki menden 126 nungi 102 nung takok angu, BJP-i menden 82 aser parnok den yariteper Asom Gana Parishad aser Bodoland Peoples Front-i menden terer (10) nung takok angu.

Himanta Biswa Sarma ya leader of the BJP legislature party shimsü imlar. Iba atema central observers J. P. Nadda aser Baijayant Panda na ketdangsuba kübok BJP MLA tem senden ka amentsü.

Külen, Asom Gana Parishad (AGP)-i leader of the legislature party atema Atul Bora shimtetogo.

Bora den külemi Deputy Leader of the legislature party asütsü atema Keshab Mahanta shim.

AGP-isa Secretary of the legislature party atema Dr Tapan Das aser Dharmeswar Roy-i Chief Whip inyaksü shimogo.

## Dimapur civil society temi railway station atema bilemstür



**Dimapur, May 6, 2026 (TYO):** Amrit Bharat Station Scheme kübok Dimapur railway station ya world-class railway station akümtsü inyakba dak sendakba onüktem asoshi Dimapur nung amenoka aliba civil societies aser kin teloktem külem senden ka menogo.

"Iba mapatong ya yaküm 5.73-acre site nung tenzük saka legal land deeds aliba nisung 96-i ali atsünga agia lir. Iba jagi patta holders 96 den tangatettep kati marura khurettem ajurutsü" ta NCD President, GK Rengma-i ashi.

Onoki railway station belena moudaktsütsü aser iba tangatetba nung kin tirtem, CSOs aser Naga Council dena lir ta pai ashi.

"5.73-acre first phase atema land survey renemogo aser patta

holders 96 nungi parnok 38-i okadak ken o tem benoka lir aser iba ajanga mapatong anendaka ayutsü akok. Okadak ken o benoka angadanga ajanga iba mapatong ya Nagaland nungi agientsü akok" ta NCD President-isa metetdaksü.

CSOs-i okadak ken o benoka alirtem den ajuruteptsü aser tarutsü pututem ajangzüksü asoshi ken o tem meyipa agitsü mepishitsü. Ano, phase 2 atema tayongzükerba tulu ka lir aser iba nung patta holders talila 109 aser ali atsünga agir aika lir ta paisa ashi.

"Onoki Naga Council kübok committees aser sub-committees tentetogo aser onoki ali kiburtem den ajurutepa jembishinütsü. Onoki ali kiburtem, railway ketdangsurtem aser sorkar den ajurutepa tangatettep kati arutsü atema inyaksü" ta GK Rengma-

isa ashi. NSD-i taruba hopta non-tribal CSOs den ajuruteptsü aser parnok dang railway station ajungketba asoshi süoki ia bilemstü ashitsü aser Nagaland nung temples aser mosques raksatsü ta olulu jembiba azüoktsü ta paisa shisem.

Dimapur Railway station construction project area sasep nung ali ken o tem angatetteptsü asoshi inyakang ta Nagaland sorkar dangi shidi ka zülutsü ta senden nung lemtetogo.

Dimapur nung amenoka aliba civil society organization (CSOs) aser kijatemi Naga Council Dimapur (NCD) pusema nungittsü aser Amrit Bharat Station Scheme kübok Dimapur Railway Station ya tajungtiba nung yanglutsüba nung yariteptsü bangjemtepogo.

## Sixth Schedule areas-i Dispur den adener

**Guwahati, May 6, 2026 (Agencies):** BJP-i aniba NDA ajanga Assam kübok Sixth Schedule areas nung takok tulu nguogo aser parnoki menden 21 nungi 20 ngutetogo.

Bodoland Territorial Council (BTC), Karbi Anglong Autonomous Council (KAAC) aser North Cachar Hills Autonomous Council (NCHAC) kübok Assembly constituency 21 lir.

Tan election results ajanga autonomous regions nung local power centres-i Dispur nung ruling government den sendaktepa maneni sayuogo.

NDA atema tamakokji Parbatjhora nung angu aser iba ya BTC kübok minority teimba aliba constituency ka lir. Congress-i autonomous council belt nung iba menden nungi dang takok angu. Tanüngba BTC menden 14 prong BJP aser parnok den teyariteper Bodoland People's Front (BPF) tsünga

lemsaogo. KAAC aser NCHAC ajanga ketdangsuba hill districts nunga BJP-i menden 6 prong nung takok nguogo.

Iba results ajanga Sixth Schedule areas nung ketdangsubaren indang sayur aser autonomous councils-i state sorkar dak dang metaloka aliba jangjadaktsür ta political observers-i ashir.

Autonomous councils ket nung constitutional autonomy lir saka Home ama tongtipang department tembo Assam sorkar kübok lir. Ano Assam sorkar dak funding aser administrative matters tashi lir aser iba jagi council ketdangsuba aoba nung ruling sorkar den adentsüba akümer.

KAAC aser NCHAC kübok hill districts nung mapang ka regional parties-i tashi benshia aruogo saka election ishika parnok tashimait kümogo.

## Kohima nung monsoon preparedness senden amen

**Dimapur, May 6, 2026 (TYO):** May 6, 2026 nü Kohima district nung monsoon preparedness senden ka ayonga menogo.

Kohima Deputy Commissioner, B. Henok Buchem, NCS menden ser amenba senden nung Senior Superintendent of Police, Kohima, Krodi Rhetso, NPS, PWD, NHIDCL, DDMA, Health & Family Welfare, Food and Civil Supplies, Police aser District Administration ketdangsurtem aden.

Kohima district nung tang gari lenmang yangluba aser Kezanu o Liezocha amala tongtipang tesemtem yanglushiba indang senden nung jembibi.

Kohima nung mapang lendongtsüdong balala ataloker, asükwa mapang kitsükkirong aser tzüngluruwa mapang anentsüh, lenmang shibang aser infrastructure raksar ta Deputy Commissioner Henok Buchem-

ashi. Asenoki lendongtsüdong atema tai tongloktsütepba malitsüla aser department temi tesüiba ajangshibatem nungi angazüker renemshitsüla ta pai ashi.

Kohima district nung tesem kar nung aser talisa Liezocha aser Kezanu tsünga ali anenoka ayir. Ano lenmang nung garitem raksar anena ayuba ajanga traffic timtem ajurur aser lendong ataloktsü ana nung lir ta senden nung lemsatep.

Lenmang tongtipangtem hopta ka tsünga yanglushitsüla aser mapang shia stone filling aser metalling ajanga anepalutsüla ta senden nungsa jembibep.

Maneni, tongtipangtesemtem nung excavators aser towing vehicles mapa lezmüksütsüla aser nodal officers lezmüksütsüla ta parnokisa jembio.

National Highway nung

anentsüh kanga aluba tesemtem nung machinery ayutsüla, jana yadoktsüla aser tzüngluruwa mapang wapetsa tesemtem tashi itdaksütsüla ta senden nungsa jembibi.

Maneni, jana enokba aser pipeline noktanga ajanga drainage systems tangbanga ayuba ya tongtipang tebilemstü ka lir aser War Cemetery anasa aliba drain dena tangabanga aliba drains lapoktsüla ta tetuyuba agütsü.

Disaster Management Authority ketdangsurtemia Incident Response System (IRS) den Quick Response Teams aser trained community volunteers renema aliba osang metetdaksü.

Tesem aika nung Automatic Weather Stations amenoka lir aser control rooms o State Emergency Operations Centre ajanga repranger. Nüngdak süra IRS activation asütsüla ta Deputy Commissioner-i ashi.



## Dept. of Industries & Commerce ketdangsürtemi Dawki Land Port semdang



Director, Industries & Commerce, P. Tokugha Sema-i anir Department of Industries & Commerce, Nagaland nungi ketdangsürtem aser Business Association of Nagas nungi lenirtemi Dawki Land Port, Meghalaya semdangba mapang tangokba noksa nung angur.

**Dimapur, Monupii/May 06 (TYO):** Director, P. Tokugha Sema den Additional Director, Y. Lipongse Thongtsar nati anir Department of Industries & Commerce, Government of Nagaland nungi ketdangsürtem aser Business Association of Nagas (BAN) züngsem temi May 4, 2026 nü Meghalaya nung aliba Dawki Land Port semdanga liasü.

Shishilempaba tesendaktep tajungba akumtsü asoshi lenmang bushia aser Dawki Land Port nung inyaksangshi angatetsü nükjidong nung parnoki iba tesem ya semdanga liasü.

Nagaland nung tajungtiba

yimya amshitsü atema jangjatetsü nükjidong nung parnoki iba tesem semdanga ki o jen, logistics aser trade facilitation systems asadanga jaja.

Iba mapang parnoki Regional Administrator, Port Administrator aser stakeholders tem densema Land Port nungi ketdangsürtem den sensaksemba senden mena trade processes, regulatory frameworks aser ayokba aser aliba inyakyim ulushitsü atema maongka balala indang shisatsü angazüka liasü.

Iba mapang parnoki Nagaland nung local entrepreneurs, aluyimer aser

shishilempartem asoshi market lenmang tesadamba lapokja Nagaland nunga iba mesük inyakyim amenoktsü lenmangtem bushia liasü.

Maneni integrated trade and logistics systems angatetba nung tali tashi itshitsü atema parnoki May 5, 2026 nü Amingaon, Guwahati nung aliba Inland Container Depot (ICD) semdang.

Parnoki iba tesem semdangba ajanga container nung bona aliba oset amshiyim, customs clearance procedures aser logistics management systems indang tali tajungba nung angateta liasü.

## Kohima nung HoDs atema workshop ayongzük

**Dimapur, Monupii/May 06 (TYO):** Heads of Departments (HoDs) ajunga atema anogo ka sensitization workshop ka Directorate of Treasuries & Accounts, Kohima ajanga May 6, 2026 nü Capital Convention Centre, Kohima nung ayongzük.

Iba sentong ya ajanga department balala nungi ketdangsürtem külemi lungjemdakja sorkar offices tem nung senotsü amshiyim aser administrative ochishia mapa shidak inyakba indang tangatetba tashi itshidaksü.

HoDs temi senotsü tali tejangjaba, tajungba nung

ketdangsüba yimya tali jangjashitsü nükjidong nung iba workshop ya aayongzük. Inyakyim balala nung rangloker session tem ayongzüka sensaksemba ajanga shilem agirtem CTR, sorkar sen agizükba, personal claims, danga allowances atema senotsü agizükba, advances, audit, pension, budget, osettsüset aliba, senotsü sanctions asüba aser national pension scheme indang tali tajungba nung metetjema liasü.

Inyakyim nung tapok apaba tajemba akumba, tali ochishia amshiba aser financial norms sülen shidak anidaksü indanga

jembia liasü.

Iba workshop nung shisalen sayur ya Amenla Jamir, Director, Treasuries & Accounts; Ketoulhou Metha, OSD Budget, Finance Department; Vechiso Chakesang,

Addl. Director, Treasuries & Accounts; I. Aochuba Pongener, Addl. Director, Treasuries &

Accounts; Chibemo Shitirie, Sr. Audit Officer, AG; Shaji K, Sr. Accounts Officer AG aser Aienla Pongen, former Consultant Contract Management, NHP (World Bank) nungertem liasü.

## BJP Nagaland-i Noklak nung workshop ka ayongzük



**Dimapur, Monupii/May 06 (TYO):** Bharatiya Janata Party, Nagaland ajanga Noklak, Tuensang aser Kiphire districts tem atema anogo ana district-level Pandit Deendayal Upadhyaya Prashikshan Mahabhayan-2026 workshop sentong May 5-6, 2026 anogotem White Hall, Noklak nung ayongzüka liasü.

Party inyakyim tashi itshitsü aser par tangatetba tali jangjatsü, leadership skills aser

party workers tem tesendaktep alitsü nungdakba lemsatetp.

Iba workshop nung Integral Humanism, Cultural nationalism, lokti inyakba yimya, welfare scheme aser osangtsüsang prokshiba nung media aser Artificial Intelligence amshiba indang awajema liasü.

Kasa mapang booth-level tashi itshiba nunga tali temung agüja liasü. Iba sendong nung taoba minister V. Kashiho Sangtam aser dangartem aden.

## Peren DPDB senden nung Nagaland Foothill Road indang jembia

**Dimapur, Monupii/May 06 (TYO):** Ita shia amenba District Planning and Development Board (DPDB), Peren senden May ita atema Deputy Commissioner and Vice Chairman, DPDB Peren, Hiazu Meru lenisüba kübok May 6, 2026 nü Deputy Commissioner, Peren indang Conference Hall nung mena liasü.

Iba senden nung mendeni DPDB züngsemtem pela agizük aser alakteta District Legal Service Authority nungi jaokertem pelashishia agizüka liasü.

Iba senden nung züngsem tasentem - ADC Tening, Neilezo; Executive Engineer (PHED), Er. Kenisevi Meyase; DPO, CD-I (H&FW), Dr. Caroline aser BDO Tening (Designate), Dualukbe Newme nungertem metetpelaba mapang ahia liasü.

Iba sülen parnoki taoba senden nung lemteta alibatem lepa reprangshia onük balala jembia. Iba mapang Foothill Road Project indang tejangja sensaksemba liasü. Mendeni züngsemtem dang iba maparen indang lemsatetp aser iba sülen Tribal Hohos nungi par tangatetba lemsatetp liasü.

Iba mapang NZPO aser Kuki

Inpi densema Tribal Hohos tem dang stakeholders den kanga junga shisa agitepa tangatetp kati arutsü asüngdanga liasü. Iba den ano parnok dang tang aliba lenmang tasazük lenden metres 12 nung bendenloksema ali metres asem iba project atema meshitsü stakeholders den jembitsü mepishi.

Iba senden nung Inter-Departmental Tournament indanga jembia aser tesüiba küm ajangshiba lemsatetp taküm iba asayamung District Headquarters nung ayongzüksü tebilemba lir ta metetdaksü aser organizing committee ka shima iba atema mapa inyak tenzüksü nungloksü.

Senden nung Department of Veterinary and Animal Husbandry nungi Dr. Suiyipeube Mpom-i Peren district nung ak metsütsü atema nukla tajung aliba indang PowerPoint presentation agüja liasü.

District Legal Services Authority nungi Panel Lawyer Kewithinwang-ia par inyakyim aser inyaksü sentongtem lemsatetp aser iba mapang Peren Town nung May 16, 2026 nü District-Level Legal Awareness Camp ka ayongzüksü sentong lir ta metetdakja liasü.

## Tuensang nung Livestock Insurance indang training ayongzük



Bodhbarnü CVO Conference Hall, Tuensang nung Livestock Insurance scheme indang training sentong ka ayongzükba mapang tangokba noksa ka nung CVO Tuensang, Dr. N. Wopenthung Odyuo den ketdangsürtem aser shilem agirtem angur.

**Dimapur, Monupii/May 06 (TYO):** National Livestock Mission (NLM) 2025-2026 kübok Para- Veterinarian aser aluyimertem atema Livestock Insurance scheme indang training sentong ka May 6, 2026 nü CVO Conference Hall, Tuensang nung ayongzüka liasü.

CVO Tuensang aser Shamator, Dr. N. Wopenthung Odyuo-i iba sentong ayongzükba nükjidong lemsatetpdang, kiset shiruru metsüba ya Naga nung asoshi business aser pei nungdak nung amshiteter, kong alimar lendong mapang rongsenketzung nung takoksa tulu ajuruba lir, ta ashi.

Livestock Insurance scheme

yagi kiset shiruru asüba mapang aluyimer nem temelen teyari agütsür, ta pai ashi.

Iba insurance scheme ya National Insurance Company Limited den lungjemer aluyimer temi metsüba shiruru asüba mapang senotsü teyari agütsütsü nükjidong nung tenzük, ta pai ashi.

Iba mapang Dr. Aojongshi Chang FM, SCRC ajanga Livestock Insurance, temzüng-ozüng, senotsü teyari balala iba scheme ajanga awajemba indang lemsatetp liasü.

Sentong nung Dr. Tangnio Shiu, FM, SCBF menden liasü, kong Tuensang nungi aluyimer aser Para Veterinarian tem aden.





May 06, 2026 nü New Delhi nung Tir, Droupadi Murmu aser Ato kilonser Narendra Modi nati Vietnam Tir, To Lam agizükba sülen tangokba noksa nung angur.

### Vijay-i sorkar akümtsü asüngdangba Tamil Nadu Angh-i magizük

**Chennai, May 06 (Agencies):** Bodhbarnü Tamil Nadu nung Tamilaga Vettri Kazhagam (TVK) tongti lenir, Vijay-i Raj Bhavan-i oa state Angh, Rajendra Arlekar ajurua sorkar akümtsü atema asüngdang saka Angh-i magizük. Osang angazükba agi, Angh temelung asütsüsa TVK-i nübo peria mesayutet. Tawa Tamil Nadu election nung TVK-i menden 108 tashi nung takok ngua single-largest party kümogo, ajisüaka Vijay-i pai takok anguba menden ana (Tiruchirapalli East aser Perambur) nungi kabo toktsütsüsa akümtsü, anungji

TVK züngsem 107 dang asütsü. Congress MLA pongui TVK yaritsü nangzükogo, anungji ajak senteper menden 112 asütsü, ajisüaka simple majority atema ano menden trok nüngdaker. Anepdang Angh-i, TVK-i sorkar akümtsü asüngdanga shidi ka züluogo aser nikongdang parnoki ni ajurutsü, ta metetdakja liasü. Iba election nung Congress-i DMK-i aniba teloktep nung densema toktep, ajisüaka sorkar akümtsü atema parnoki TVK pusemstsü telemtetba agiogo. Tamil Nadu Congress Tir K

Selvaperunthagai aser party state in-charge Girish Chodankar nati Vijay ajurua party-i TVK yaritsü, ta tezüluba nung agütsüogo. Osangbenertem den jembidang Selvaperunthagai-i, iba telemtetba ya party nung bangdak lenirtemi agiba telemtetba lir, ta metetdaksü. DMK lenir Saravanan Annadurai-ibo Congress-i TVK yaritsü telemtetba agibaji INDIA teloktep partners ashioksüba lir, ta metetdaksü. Paisa, iba telemtetba agiba atema Congress-i sasatsü aser 2029 küm election jakdang parnok dak melung melemtettsü, ta metetdaksü.

### Taila video ajanga nisung ka sen lakh 8 jungnüa takoksa angu

**Belagavi (Karnataka), May 06 (Agencies):** Karnataka kübok Belagavi yimti nung online nung taila investment schema ka ajanga arrshi küm 76 tambur ka kanga takoksa nguogo. Online investment ji Artificial Intelligence (AI) ajanga yangluba 'deepfake' video ka liasü aser iba nungji Union Finance Minister Nirmala Sitharaman tenüing amshia liasü, ta Bodhbarnü police-i metetdaksü. Iba dak sendakba nung May 1 anogo nung cybercrime police station nung ken o ka benokogo. Bodhbarnü Belagavi Police Commissioner, Bhushan Gulabrao Borase-i ashiba agi, takoksa angusangji Prakash Gubbi lir. Gubbi-i ashiba agi, yaküm November ita nung pai YouTube nung video ka angu, aser iba video nungji Union Finance Minister, Nirmala Sitharaman-i investment scheme ka indang metetdakja liasü. Kasa video nungjisa senötsü invest asütsü atema link ka lemsatepa lir. Gubbi-i 'link' nungji anemba sülen pa indang osang tejangja

metetdaksü; iba sülen social media ajanga nisung kati pa den tongtepratep aser pa dang invest asütsü asüngdang. Mezüngbu Gubbi-i sen ishika dang invest asü, saka app nungji pai dollar sen 65,000 aazükba sayu. Anungji pai senji agizüktsü merangba mapang nung mejangiaba nisung jagi pa dang "customs duty" atema tamasa sen lakh 4.2 inokjang ta ashi, iba sülen-a ano sen lakh 2 inokjang ta ashi. Iba mapang tashi nungjibo pai pa ashiokdaksüogo ta meteta liasü. Pai ajak senteper sen lakh 7.9 takoksa angu. Pai ashiba kuli nung ajemdaker Information Technology Act kübok ken o ka benokba sülen police-i bushisüngdang tenzükogo. Police Commissioner-i nüburtem dang online nung item ama video ji mamangtsüla, kechiyong union finance minister-i item ama schemes ji mesangdonger, ta metetdaksü. Paisa, artificial intelligence aser deepfake technology amshia yangluba video aika online nung angutsü, anungji nüburtem kanga kümdanga alitsüla, ta metetdaksü.

### Kerala nung CM menden atema Congress-i Observers team ka yoktsü

**New Delhi, May 06 (Agencies):** Tawa Kerala assembly election nung Congress-i takok anguba sülen Chief Minister shimtsü atema New Delhi aser Kerala yimtiba, Thiruvananthapuram na nung lenirtem kanga mazüngi lir. Chief Minister shimtsü atema anogo ishika tsüngda AICC-i observers team ka shimteta Kerala-i yoktsü. Congress-i AICC general secretary/Alappuzha MP K.C. Venugopal, assembly nung Opposition lenir, V.D. Satheesan aser Congress working committee lenir Ramesh Chennithala nung rongnung ka CM shimtsüa akok. Takok anguba sülen Venugopal-ibo MLA ajak ajurua jembishinüogo.

New Delhi nunga Congress Tir Mallikarjun Kharge aser Lok Sabha nung Opposition lenir Rahul Gandhi na mazüngi jembishinüdar. Venugopal teloki, MLA 52, Congress MP aser state nung lenir tain 14-i parnok pusemer ta metetdaksüogo. Ano külen Kerala election nung United Democratic Front lenisang Satheesan-ia CM menden aginer. Congress-i aniba UDF teloktep nung dena aliba Indian Union Muslim League (IUML)-i menden 22 nung takok ngua liasü aser parnokia CM menden atema Satheesan pusemer. Satheesan pusemer kati, "Tawa assembly election nung Satheesan-i agiba tongti shilem aser tesüiba by election asem

nung pai agiba shilemji paidoktsü makok. Pai pa kija tashi amshia assembly nung aser assembly adener-a chief minister Pinarayi Vijayan anema nokdaka liasü," ta metetdaksü. Ano külen Chennithala-ia pa tambuti, anungji pa nem chief minister menden agütsütsüla, ta ashir. 2021 küm assembly elections sülen pai opposition lenir menden aginüa liasü, saka Satheesan ang shimba atema pai bangdak lenirtem dang mepelai liasü. Venugopal nem CM menden magütsütsü atema Satheesan aser Chennithala na longjemer ama reprangteter, ajisüaka CM menden atema telemtetba agitsüji Rahul Gandhi dak tuluka keta lir.



May 06, 2026 nü Paramaribo, Suriname nung Suriname Foreign Minister, Melvin Bouva-i India External Affairs Minister, S Jaishankar agizükdang tangokba noksa nung angur.

### May 8 nü Bengal nung BJP-i legislative party lenir shimtsü

**Kolkata, Monupii/May 06 (Agencies):** Tang mezüng West Bengal nung BJP-i May 9 nü Kolkata nung aliba Brigade Parade Ground nung sorkar tenangzükba agitsü lia May 8 nikongdang tang tasen shimba BJP MLA tem senden ka ayongzükba lir, aser iba senden nungji legislative party lenir shimtsü. May 8 nü legislative party lenir shimtsü atema Central Observer ji Home Minister Amit Shah shim aser coobserver ji Odisha Chief Minister Mohan Charan Majhi asütsü. May 9 nü tenangzükba agiba sentong nungji Ato kilonser Narendra Modi, Union Home Minister Amit Shah, BJP Tir Nitin Nabin, Union Minister tem aser BJP aser NDA teloktepi yimsüsüba state tem nungi chief minister tem adentsü. Bengal BJP Tir Samik Bhattacharya-i, "BJP sorkar tasenbai May 9 nü anepdang 10:00 ako nungi Brigade Parade

Ground nung tenangzükba agitsü," ta metetdaksü. BJP-i tang tashi chief minister mesangdong, ajisüaka bangdak lenirtemi assembly nung Opposition lenir, Suvendu Adhikari shimtsüa akok ta aikati bilemer. Suvendu Adhikari ya mapang ka nungbo Trinamool Congress tongti, Mamata Banerjee den kanga atongtepa inyaker ka liasü, ajisüaka 2021 küm Bengal assembly election mapang nung pai TMC toktsür BJP nung aden. Tawa agiba assembly election nung Bhabanipur menden nung pai Mamata Banerjee madak votes tali 15,000 agi takok nguogo. Election atema nüboyimba mapang nung Union Home Minister Amit Shah-i, Bengal nung chief minister ji Bengali nung asütsü, ta aiben jembia aruogo. Tawa election nung BJP-i menden 207 tashi nung takok anguba ajanga Trinamool Congress sorkar atüngdokogo.



May 06, 2026 nü Rupnagar district nung Punjab Chief Minister, Bhagwant Mann-i 'Shukrana Yatra' sentong nung lokti ka den jembidang tangokba noksa nung angur.





## TIR YIMYIM YIMOBILEM (EDITRIAL)

DIMAPUR THURSDAY, MAY (MONUPII) 07, 2026

### Anepalur maliba lima

**N**agaland state ya tanurbo tajung ser nung anepalur maliba agi raksadaksüba taküm amai, alimabo tajung aser nisungtema tajung saka anepalur maliba agi jungnüseta Nagaland merenlokteti raksadagi aser nisungtema mazüokteti kümogo. Aji oda, government-i government meyong ali kimong aser yimkong lenmang dena wazüka meyteter, kechiyong wazüka ayutsü melen pei meyong akümer. Iba jagi tanü Nagaland nung government meyong school aser mozü ki kimongtem dena atsüngsepa agiadokba tesem aika nung angutsü. Kasaji, government-i yimkong gari lenmanga wazüka meyteti ali nung morumorurtem nem atsüngsepa agidaksüba agi tesem aika nung gari anata mesüiteptet timtemba angutsü. Item ajak dakji alaka, Nagaland government-i pei meyong rongsen junga wazüka meytetba ajanga Dimapur Railway station ya linük nung Railway station tulu aser tajungtem rongnung ka asütsüsa yanglutsü atema India government-ibo sen peria lemzüka yuja liaka, nisungtemi Railway li atsüngsepa agiadokba agi ulushia meyanglutet anena lir. Odanga asenok ya train nung jajaba nüboritem masü aser ano aikati train-a mengudangia alitsü, anungji train ajanga tajangzük angubattem asenoki magidang aser memetet. Ajisüaka, asen alidak train anentsüsa alibaji asenok senzusenpongertem asoshi dang masü saka shishilembartem asoshi khu abenba nung teyari aser tajangzük tulu angur. Ano asenoki memetet aser memerangdanger dang ashi, train station tuluka amenokba ajanga nisung aika ita sen chia alitsüba mapai iteter aser ano railway station nung süngo aser osettem ayokdak dokan aika lapokteter. Item maongka aser tajangzüktemji kodang asen lima nung train station tuluba küma yanglutetdir, idangji asen lanurtem meyrirjang jungai angutsü. Tanübo, nisung ishikati Dimapur nung Train station asütsüba li tuluka agiadokba agi train station tuluba küma yanglunüa ka meyangluteter aser item ali atsünga agirtem dangjia government-i kecha meshiteter, kechiyong item ali kiburtem ket nunga Nagaland government-i agütsüba ali temelaba kaket alitsü. Asen government-ji iba ama government-ji lir. Joko, tatem nung Naga Council Dimapur ajanga Railway Authority aser Nagaland government dangi Dimapur train station ulushia yanglutsüba sentong ya tamakok maludaktsüi mapang shitak nung renemtsüsa mapa tenzüka inyaktsü asoshi takangba ka agütsütsü lemtetogo. Atangji, Dimapur nung train station tuluka lapokba jagi Dimapur nung alirtem dang ajangzüksü ta masü saka ibaibo Nagaland nung alir ajak ajangzüksüba mapa ka lir, anungji Naga Council Dimapur-i dang masü saka Nagaland nung tenteta aliba kintem telungjem ajaki Naga Council Dimapur pusema ola adoktsü tim. Aji oda, Dimapur Railway station li ser nung, kibur maliba li amai kümer lia shirnokia agia lir, parnokia nüboritem ajangzükdaktsütsü mechi aliji, angatisa mesüaka, tangatetep nung meyipa agütsütsüla. Takaribo pei lima dang jungerbo aser pei nüboritem dang ajangzükdi serbo, pei li dena lepzüka tenla agütsür. Aji oda, kasa tangatetba nung shirnokia Railway atema ayuba li atsünga agia ali, parnoki parnok ket nung akaba liji tenla amai alimenok teraka agir agütsütsüla. Iba amajika meinyatetra, joko lokti tentetemi teka maidang, Nagaland government-i telemtetba takang ka agir, mapa tenzüksüla. Nagaland nung mapang talangka government ali kimong anükertemi kangasa temulung magütsüi aruogo, iba jagi tanü Nagaland nung terenlok mapa inyakdak government li maka kümogo. Joko, asenoka tangatetba shisa tenük saker, taoba mapang nung inyakeritem jilu mereprangi, pei lima aser pei nüboritem meima anepalu tenzüksübaaji government nung inyaker ser meinyaker ajak khuret asütsüla. Ibai government li atsünga agiba putu masü saka government li aser government rongsen ajungaji yimkong meyong ta angateta wazüka ayutsü aser anepalutsütsüba mapang lir.

## OLEMSABANG

### YAMELENSHINUNG MAJUNGTSÜNO?

~ R. Imkong LKR, Aolijen Mepu, Near C.T.C MKG

Tanü asenok Khristanpurtemi asenok tejen yimsü Otsüla Oboula mapang nungi benshia aruba yimyatem tu ano khen agi mentoki metsünga reta benshia aoba angur. Süra item purtem dangji shidakba Khristan nüburtem ta ajatsü akok asü? Masü, yamaji kodanga ajatsü makok, tanü Khristanpurtem ya tatsüka masü, mesüra temokong aa masü, saka item purtem dangji telempet Khristanpurtem ta ajar.

Tanü asenok amangbapurtem kibong kar nung tasü tama tensa ajurutang Pastor aser Reverend kati anir Deacontem kar anidaka meina aor aser deacontem rongnung kati sarasadema maparen tenzüka aor, idangji pastori tasü tama ajurur aliba kinüngertem nem tepila salem O ashitsü mapang agütsür, aser tatem nung Pastorbai Tsüngrem O kar Lai nungi zünga iba teratetji yangji sentepa alirtemn dangji rasa shiyonga aor, aser item tetezütem jagi jashia mangyima alirtem nem teimla tasen ka agütsür aser temang yabo teti asoshi temulung anisüngzük agütsür. Aji oda asen akümlir ka ajongli ka tang ta angatetdaksür, saka shirnokisa pei akümlitang Tsüngremi aginütsüsa liteter, paji mesüra laji süaka parnok tanelatemji tekümsükdak Kodak li nung tatem maka anisüngzükdak alitsü indang sentepa alirtem ajak mulungjang nung anisüngzük teimla ka apuoktsür. Saka shirnokisa ali shi nung tangatetba tajung mali züzüa tang liteper parnok asoshibo kecha tajangzük mangutsü. Iba ama tasü tama anogotem nung shirnokisa aria bilemja mangyimdaki aruba den külemi temeim mapa sayua sen-o-tsü terara tang süaka mesüra ano asü mangmong nung amongertem nem süngojemtsü atema tila tari teyari pei akokba yari agütsüteper, item temiem mapa ya koda tepur tajung. Saka akhi putu mapang nungi benshia aruba yimsütemtu ano meindoki tebur kar süra anogo 6 (teroknü) mangyima amonger, aser tetsür kar süadokra anogo 5 (pungonü) mangyima amonger. Item anogotem nungji asü amar kibong nem temeimertemi sen-o tsü aser tanga teyari terara bendentsüba tu ajak okshia mechima tashi mongteper, aser kar kibong nungbo temeimertem bendentsüba dak tu ano talila apoloksemer endoktsüsa akümer.

Iba ama yimya jagi tasü tama kibongtem dak tu ano shisabulutsü khuret taliang bendenloktsür. Ashiko, karibo iba ama yimya benshiba ya benjongbentsü tulu ayongzük amaiang bilema alitsüa shibaibo metet, item amala yimya jagi tarutsü mapangtem nungbo sensak tiai ang anitsü ta tsübuseta bilemetsür. Item yimya benshirtem dangji kodaser khristan tajung kaka ta ajatsü? Item amala mapa benshirtem, nenoki maaker no? aser Tsüngrem akhüm metsübur no? Koda tesüngmangtsü item nüburtem. Iba ama anogo 6 (terok) aser 5 (pongu) nü tembanga arudang Pastor mesüra Deacon kar jar sarasadema tembanger. Item tejen putu yimya ya tanüa kanga metsünga reta mongteper, aser yangji pastortem aser Deacontema jenbua mali ta metettsüla. Aji oda temeshi Laishibaibo yamai ashir, tamangertemi mamangertem den süngpu kasa nung maputeptsüla, aser shirnokisa item mapatem nung masüngteti inyaker item dangji Khristan tajung kaka ta ajatsü makok ta metetangma. Amen.

**Iba Olemsabang nung lemsaba ken-o aser shisatsü ya iba ocet züluri bilemaba ken-o ama tazüngeru angateta agitsü mepishir**



# 'Baptize California' sentong nung nisung noklang aika bapti



May 02, 2026 nü Corona Del nung aliba Pirate's Cove nung 'Baptize California' sentong nung nisung aika baptidang tangokba noksa nung angur.

**May 05, 2026:** May 02, 2026 anogo nung Corona Del, California nung aliba Pirate's Cove nung nisung meyirjang aika adenshia Baptize California sentong nung aden aser nisung noklang aikati Yisu Khrista agizüka baptiogo.

Iba sentong nung Tiffany Hudson, Abbie Gamboa, Matt Crocker aser Oceans Music-i tekülem aser tetushi ania liasü.

Baptize organization-i social media ajanga, "Tanü onok Baptize California atema adenshi aser Pirates Cove tzüymküm nung tanela asentenshi milak tulu jangrua liasü. Iba tesem nung tamang, nüchiso aser Tsüngrem liasü. Onoki kulisüa anguba ya sentong ka dang masü saka yangi California nung kodak nung adenshiba amai liasü. Iba ya tetenzüker dang! Yangi revival lir," ta metetdaksü.

Pirate's Cove ya 1970s mapang nung America nung Jesus Revolution mapang

baptiba tesem aser Baptize California movement tenzükba tesem lir.

Harvest Christian Fellowship nung pastor Greg Laurie-ia tesüiba küm ishika iba tesem nung baptiba sentong ayongzükba arudar.

Tang tesüa agiba Baptize California campaign nung Arogo 30-i shilem agia liasü aser baptisü atema nisung 650-i jelia tenüng agütsü, ajisüaka sentong agiba anogo nungbo nisung 1,000 dak tali bapti.

May 24 nü Pentecost Sunday nunga Baptize America aser Baptize the World sentong ayongzükba agitsü aser iba atema Arogo aikati Baptize.org nung register süogo.

Baptize The World-i Instagram ajanga, "Iba ya tetenzüker dang, ta onoki amanger. Yangi atalokba ya maneni proktsü aser ibaji ajanga yimitem, state tem aser tarutsü putu aika kongshitsü. Tenyartem Mapa 19 ajanga

kintem melungjang akasodakjang," ta metetdaksü.

Southern California nung aliba tzüymküm nung baptiba sentongtem agiba ajanga US nung aliba Arogo tem aika longjemdaksüogo.

Tang tashi nung iba movement ajanga Arogo 1,600 dak tali longjemdaksüogo aser tesüiba ita 24 tsüngda nisung 50,790 dak tali baptiogo.

Sentong ayongzükertemi ashiba agi, May 24 nü Baptize the World sentong nungji linük 60 dak temai shilem agitsü.

Oceans Church nung pastor Mark Francey-i, "Baptiba ya tzü nung remokba mapang ka dang masü saka Yisu Khristai taküm melenshidaktsüba yimjak nung kulisüba lir. Iba movement tashi aitba ya yimitem, state tem aser linüktem nung Yisu tenüng ajungkettsütsü aser takümtem melenshidaktsütsü atema Arogo tem longjemba ajanga lir," ta metetdaksü.

# ANOGO ABEN TSÜNGREM DEN

## Ne meyong masü

"Kibuba asoshi ya tenüngdaksü."

Mark 11:3.

Gado chanu amshitsü atema kibur dang asüngdangba mangur. Kibubai nütsüngtem Tsüngrem tashi amshitsü tenya. Asen akaba ajak nung Kibuba temeden lir ta sayur. Kibuba teka nungi anguba oset nung asenok temeden agitsü kecha mali. Rongsenji asenok meyong ama asenoki jembir. Asenoki rizüngba kecha mali. Kibuba pa asoshi amshitsü asenok nem aputsü.

Khristai asenok nem agütsü aser kodangsa Pa nüngdaker Pai amshitsü Pa temeten lir. Asen sen asüngdangtsü Pa temeten lir, kechiaser iba asen meyong dang nungi temaba Pa meyong lir. Rongsen dang pai aputsür masü, taküma pai aputsür, saka kodang pa nüngdaker pai bener aor. Yirua aliba nisung abentsü asoshi Kibubai Tajung Samaria nungba Gado nüngdak. Telok tulu mesütsü asoshi tanur ka nungi amtsük meshi.

Tetsü kati lar tanur dang Khrista mulungba nung amshitsü asoshi la akaba ajak Khrista nem agütsütsü ta sayua liasü. "Kechiba, oja," ta lai asüngdang, lai langzü, "Yisui kü kazütsü (doll) kodanga mamshir." Mapang tatsü ka tsüngda nung tanur kati sensaker tanur ka la kazütsü oset den asayatepa kar kishizüngi aru. Kibubai aji mamshir asü ? Tangar khuret abentsü asoshi Kibubai asen gado nüngdaksü akok, mesüra shirnok mejajateter, pamok abentsü asoshi pai asen sen nüngdaker, aser teka, tetsüng, tebang, asen taküm kuli; aser Pai mulungba nung asen rongsen amshidang aseni Pa asoshi junga inyaker.

# Korea nunger missionary 3 nem Human Rights Award agütsütsü



**May 5, 2026:** North Korea nung tesüiba küm 10 dak tali tepuokdak aliba Korea nunger missionary asem nem taküm August ita nung Graciela Fernandez Meijide Human Rights Award agütsütsü, ta osang ka ajanga metetdaksü.

Missionary asemji Choi Chun-gil, Kim Jong-Uk aser Kim Kuk-gi nunger lir. Par asemi North Korea nungi jena aoertem yariba den külemi Northeast China nung underground Arogo tem nung züngsemtem tenzükba liasü. Ajisüaka parnok apuba sülen tepuokdak puoka liasü.

Arrshi küm 62 missionary Kim Jong-Uk-i China nung jenoka aliba North Korea nunger

refugee tem yaria liasü. Pai Laishiba aika bener North Korea telungi aiba sülen 2013 küm ketdangsertemi pa pua liasü.

Arrshi küm 72, Pastor Kim Kuk-gi-ia China nung North Korea nungi jena arurtem yaria liasü. 2014 küm October ita nung pa apu aser linük ashioksüba den külemi yimsü prokba atema pa aija tepuokdak ayu.

Arrshi küm 70, missionary Choi Chun-gil-i North Korea telungi Khristan kaketem bener aiba aser North Korea nunger nem teyari balala agütsüba atema 2014 küm December ita nung pa apu aser ketdangsertemi, pai itdangitba mapa inyakogo, ta pa nem tai

tongloksü.

North Korea nung ketdangsertemi missionary asempronglaji North Korean labor camp nung taküm piyong puoka ayutsü tuyua liasü.

South Korea sorkaribo mapang shia missionary asemji chioksü takhangba agütsür.

North Korea nung Communist ketdangsertemi Khristan tem jail aser labor camps nung puoka ayur. Item jail aser camps nung Khristan tem chiyungtsü shidak magütsür saka mapabo tali inyakdaksür, ano khenkhenbo reshikangshir.

Tang North Korea nung jail aser labor camps nung Khristan 30,000 dak tali lir.

# Mozambique nung Jihadist teloki Tenla ki ka rongdoktsü

**May 06, 2026:** April 30, 2026 nü Mozambique nung jihadist teloki yim ka amakba mapang nung akhidang asüba Tenla ki ka rongdoktsüogo.

Meza anasa Minhoene yim dak St Louis de Montfort Church Tenla ki rongdoktsüba sülen Bishops' Conference of Mozambique Tir, Archbishop Inçio Saure of Nampula-i nüburtem dang rara anentsü aser yimjung nung alitsü tayongzükba agütsü.

Nampula-i, "Raraba aser nisung tepsetba anenang. Tesempa agi Khristan tem anema inyaktsü ajungshiba anenang, aser onoki Islamophobia-a memelatsüla, kechiyong Muslim nungertemji asen tsükchirtem masü saka temeim adianutem lir," ta metetdaksü.

Paisa, Khristan tem aser Tenla kitem amakba ya Mozambique nunger sobaliba anema lir, kechiyong iba linük nung akhidang nungi yimsü balala amangertem tsüngda tesünep nung alir, ta metetdaksü.

Aid to the Church in Need (ACN)-i ashiba agi, April 30 nü Islamic State: Central Africa Province den tesendaktep alir Jihadist temi amakba mapang nung nisung shinga masü.

April 30 nikongdang 4:00 ako meta kiralongrartemji Tenla ki telungi aiba sülen mi senoktsü aser Arogo office den putir meyong ki-a rongdokja liasü.

St Louis de Montfort Arogo ya 1946 küm tenteta liasü aser Muslim nunger nütsüng teimba aliba area nung Khristan centres ishika rongnung iba ya densema liasü.

Tang iba Arogo nung tenzükertemji Cameroon nungi missionary tem lir, ajisüaka kiralongrartemji amakba mapang nung parnok maliasü.

2017 küm nungi Mozambique nung Islamic telok balalai timtem agütsü tenzükba sülen tang tashi nung nisung 6,300 dak tali tepsetogo aser million I shi jenshiogo.

2017 küm nungi tenzükba tang tashi nung jihadist telok balalai Tenla kitem aser Khristan tekülem kitem 118 raksatsüogo.



**AO OSHI ANGAZÜKDAK:**

**TANÜ ANGAZÜKTSÜBA OJANG**



**Yangsem**

(n) Nisung dak Tsüngrem jungkai adokba (incarnation)

\* Tsüngrem chir Yisu nisung den yangsem.

**Yangtep**

(v) anogo melentepa yaritepba ( help turn by turn in work)

\* Merenba küna yangtepa alu mapa inyak.

**OLONG PAITEP # 7496**

	1	2		3	4	5
6					7	
			8	9		
		10				
11						
			12			
13	14	15				16
17						18

**TIPIEN**

- 1. Inyaker ajangtetba - (3)
- 3. Bangsemo adokdak - (5)
- 6. Shitak mesüi inyak - (7)
- 7. Ya mimong nung angur - (3)
- 9. Reprangzük - (4)
- 10. Tasola - (5)
- 11. S \_\_\_\_\_ - (4)
- 13. Yagi ajak ashioxtsür - (3)
- 15. Ki aokba oset - (7)
- 17. Ak shi nung inokba tasen - (5)
- 18. Ishika - (3)

**LANGTSÜNGLEN**

- 1. Meshidak - (3)
- 2. Tanaben soshir - (7)
- 3. Iba anogo - (4)
- 4. Meshi - (3)
- 5. Yagi mi tsükloker - (9)
- 6. Shi tapu ka - (9)
- 8. Yagi ayimer saka ozü masü - (3)
- 9. Ajokba shiruru ka - (7)
- 12. Inyaktet - (4)
- 14. \_\_\_ hi - (3)
- 16. Akümüli nungi pilar - (3)

**OLONG PAITEP # 7495 TELANGZÜBA**

**TIPIEN :**

- 1. Tesangra, 5. Mungo, 7. Kisen,
- 8. Salem, 12. Semki, 14. Kilem,
- 15. Kensü, 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.

**NAI-A YA METETTER**




Ranchi nunger arishi küm 7 tain Ishank Singh-i India aser Sri Lanka tsüngda Palk Strait wadangtetogo aser iba ajanga pa nem 'Youngest and Fastest Palk Strait Swimmer' naroküm aser '2026 OWSAT World Record' agütsüogo.

April 30, 2026 nü Ishank-i Sri Lanka kübok Talaimannar nungi tzü awatsü tenzük aser Tamil Nadu kübok Dhanushkoditonga awa. Ishank-i kilometre 29 talang Palk Strait ya ghonda 9 ser minute 50 nung wadangtetogo.

**Meghalaya sorkari state fish shimogo**

**ANATOMY OF THE CHOCOLATE MAHSEER (*Neolissochilus hexagonolepis*)**



Shillong, May 6, 2026

(Agencies): Meghalaya sorkari parnok state fish asütsü atema Chocolate Mahseer (*Neolissochilus hexagonolepis*) shimetogo.

May 5, 2026 nü Chief Minister Conrad K Sangma menden ser Cabinet senden ka amending iba lemtet agia liasü.

Iba angur aser parnok Khasi agi

Khasaw aser Garo agi Na-rang ta ajar.

"Linük nung tanga state tem ama masü asen state nung officially designated state fish mali. Iba jagi angur wazüka ayutsü, kümzüksü aser lisopur angur ajungkettsü atema iba lemtet agiogo" ta CM Conrad-i ashi.

Chocolate Mahseer ya freshwater fish ka lir aser

Himalayas nung tzü kanga kara ayimba ayong aser ayongnutem nung angur. Iba angur ya angopurtemi kanga senti ama züngshir aser iba angur aliba ayong ecosystems tajung ta züngshir.

Iba angur nem state fish jenjang agütsüba ajanga Meghalaya sorkari angur wazüka ayutsü aser iba angur aliba ayong aser ayongnutem kümzüka ayutsü ajungmesor.

**Meghalaya nung centralised provident fund scheme tenzük**

Shillong, May 6, 2026

(Agencies): Meghalaya sorkari non-government schools aser colleges nung inyaker nisung 30,000 tema nem pension aser social security benefits agüja centralised provident fund scheme ka tenzükogo.

Iban sentong dang Meghalaya Non-Government School and College Employees Centralised Provident Fund Scheme, 2026 ta ajar aser education sector employees ajak inyakyim ka kübok anioxtsü

nükjidorong lir.

Iba scheme kübok deficit teachers & lecturers, ad hoc teachers, SSA & RMSA teachers, Hindi & Science Grant teachers, pre-primary teachers, aser non-teaching staff adener.

Iba sentong ajanga temelenshi tulu bentsür arur kechiyong mapa inyaker aika nem structured provident fund aser pension benefits agütsür ta Education Department-i ashi.

Iba scheme nung nisung aikati shilem agir aser district

aika nung Permanent Retirement Account Numbers (PRANs) indang mapa tenzükogo. Mapa inyaker aikati iba scheme kübok adentsü atema tenung agütsüba angudang onok ajungmesor ta Education Department ketdangsürtemi ashi.

Department-i tesayur aser mapa inyaker ajak kümzüka ayutsü aser iba scheme ya tashishitsü melii aser timi inyaksü aser ajak dendaktsütsü ta ketdangsürtemisa metetdaksü.

**Pema Khandu-i NMTE recruits nem appointment orders agütsü**

Itanagar, May 6, 2026

(Agencies): Arunachal Pradesh Staff Selection Board ajanga agiba Non-Ministerial Technical Examination (NMTE) 2025 nung takok angur nem Arunachal Pradesh Chief Minister Pema Khandu-i appointment orders agütsüogo.

Iba sentong nung Rajya Sabha MP Nabam Rebia, Minister Balo Raja aser Chief Secretary Manish Kumar Gupta nunger aden.

"Ni nenok shia nem tenüngsang agütsür. Iba takok ya nenoki merangba, aremzükba aser tajungtiba asüba agi anguba lir. Nenok kibongtem aser temeimertemi nenok den külemi

noktakba ni ajiteter" ta Chief Minister Khandu-i ashi.

"Arunachal Pradesh Staff Selection Board tentetba sülen nungi appointment orders agüja arur saka tang agiba sentong ajanga candidate ajak sabang ka nung anidener. Iba sentong ajanga nenoki takok anguba atema pelaba dang masü saka government service-i aitertemi kibur akümba tangatetba angur aser sendakteper" ta Khandu-isa ashi.

"Staff Selection Board ajanga temelenshi tulu bentsür aruogo. Tesüiba nung ashishitep inyakyim ajanga temsüa aliba candidate temi timtem ajuruba ni nguogo. Ajisüaka tanübo merit nung ajemdaker recruitment

asüba inyakyim ka tenzükogo" ta paisa ashi.

Arunachal Pradesh Public Service Commission den külemi Arunachal Pradesh Public Service Commission ya ISO-certified recruitment agency ka ama lir aser tangbo asenok inyakyim akangakanga lir ta CM Khandu-isa shisem.

"Sanctioned posts 225 nungi iba tatidang ajanga mapa 183 nung nisung shimokogo. Tanü onoki candidates 166 nem appointment orders agütsür aser mapa kar eligibility issues mesüra candidate temi tanga maongkatem bushiba ajanga tazüng lir" ta paisa ashi.

**GOVERNMENT OF NAGALAND**  
**DIRECTORATE OF TECHNICAL EDUCATION**  
 Nagaland: Kohima-797004

---

**NO.DTE/SCTE/6/2023-24/46** **Dated, Kohima, the 5th May, 2026**

**NOTIFICATION**

Interested candidates are hereby invited to fill up the remaining seats in the following Diploma courses namely Civil Engineering, Computer Science & Engineering, Electrical & Electronics Engineering, Mechanical Engineering, Automobile Engineering, Electronics & Communication Engineering, Architecture Assistantship, Interior Design and Fashion Technology under State-run Polytechnics and NTTC through SPOT admission on "First Come, First Serve" basis for the academic session 2026-27.

Sd/-  
**(ER. VIPULHOU LHOUNGU)**  
 Director.



## TEPELABA LEMSATEPER

Onoki teti dang meima aliba kinüngtsü aser tsürabur **IMNAYANGLA** (Chuchuyimpang) mapang tatsüka shiranga alidang aser 03-05-2026 anogo iba alima nungi pilar külen bendang lima nungi mang bener aruba mapang aser ano asü maparen balala nung ozü kibong kija metoktsüi yimden, arogo, lokti balala aser kija kibong shirnokisa aria bilema ana aser talang nungi aruagi ozü kibong den nübu, ronsen, shisatsü aser sarasadem agi asükhu tako marok lemsatepa yaritepogo, nenok ajak dang temulungjang taroktiba nungi kangasa pelaba methods.

Nenok mapa tajung ajak asoshi ozüi tsüngdong aruagi pelaba meshitet nung iba osang ajanga nenok ajak den kangasa pelaba lemsateper.

Temoatsü agütsüsang Tsüngrem shiba Kotak nung lir, Pai nenok ajak azükarua moajangma ta ozü kibongi sarasademtsür.

*Temeim Kinüngbo, jabaso aser kinungertem*



## China leniri Iran rara nung mera ajak agia ceasefire alitsü ayongzüker

**Beijing, Monupii/May 06**

(Agencies): Bodhbarnü China indang foreign minister-i United States aser Iran tsüngta ita ana rara aliba tembangtsü asoshi inyakyim ajunga nung kongshia ceasefire alitsü ayongzüka liasü.

Wang Yi-i iba rara ajanga par linük kanga timtemer ta ashi. Pai Iran Foreign Minister Abbas Araghchi den senden ka amenba sülen iba o ya ashi, shiba US aser Israel nati February 28 nü iba rara ya tenzüker tang mezüngbuba Beijing semdang alitsü.

Mongulbarnü US Secretary of State Marco Rubio-i China ketdangsur temi Iran den Strait of Hormuz indang jembitsü imlar ta shia liasü.

China ya Tehran den ronsenketzung aser yimtenren tsütsü tesendaktep tajung aliba yong par jenjang tajung nung nokdaka lir. Trump administration-i China dang iba tesendaktep amshia Islamic Republic dang Strait of Hormuz lapokdaksütsü ajungshir.

Tezüngzüktep ka yanglutsü teimla nung US Tir Donald Trump-i Strait of Hormuz nungi commercial rong tem madokteti aliba yaria anir adoker ta sangdonga aliba anena atar ta pai ashiba sülen China nung minister-i iba o ya ashi. Ceasefire tashi mait süaka tang tashi lir, aser Hombarnü US-i iba strait tanaben lapoktsü merangba mapang khatapa liasü.

Alima nung totzü, gas, fertilizers aser danga petroleum osettem shilem tuluka abenba tongtipang tzi lenmang Iran-i shibanga ayuba ajanga totzü jenjang tali kumdakja alima ronsenketzung anokshitsü aser China ama tashi tulu aliba linüktem densema linük balala ronsenketzung tebilemstü akar.

Trump-i May 14-15 anogotem Beijing semdanga China Tir Xi Jinping den senden amentsü sentong

yanglua lia Araghchi-i China semdangba lir. Iba ya Trump asoshi kümsük tanabuba nung tang mezüngbuba China semdangba alitsü asr Trump-i 2017 küm semdangba sülen US tir-i iba linük semdangba mezüngbuba asütsü.

"Ajak amshia ceasefire ka tangsa nüngdaka lir ta onoki amanger, aser asendenshir raratsü magizüker, aser jembishinü nung temulung agütsütsü kanga tongtipang lir," ta Wang-i ashi.

China foreign minister-i iba rara ya ita ana dak tema jungogo ta ashi. Iba yagi Iran nüburtem kisung akoksaba masü saka region aser alima tesunep nung kanga sashia kongshir. Iba yagi China kanga shisabolur, ta pai ashi.

Beijing-i Iran dang strait alenbanger aliba chioktsü nüngdaker ta ashitsü imlaba U.S. Secretary of State Marco Rubio-i lemsatep.

"China nungeri pa dang kechi ashitsü nüngdakar aji ashitsü imlar. Aser nai strait nung aji inyakba ajanga alimai senzuka yutsür. Iba nungya nisung tamajungji na lir," ta Rubio-i Mongulbarnü White House nungi osangbener den jembidang ashi.

Beijing-i tashitsü tim tem dang kumdanga inyaksangshitsü aser sunepa alitsü mechi jembishinü iba rara angatetteptsü jangja-jangja shiogo, ta China indang Foreign Ministry odongtar Lin Jian-i ashi.

Yimjung jembishinü atema China-i inyaka arur aser maneni inyaksü ta paisa ashi.

Wang-i Araghchi den ajurutepta indang ministry website nung sangdong ka agütsüba nung, Iran-i nuclear nok-nü mebushtitsü nangzüka aser yimjung nung nuclear energy amshitsü par temeden tejangja China-i metsünga-reta agizüker, ta foreign ministry-i ashi.

Shishilempar rong noklang aika Persian Gulf nung

anentepa lir. US-i Hombarnü 'safe shipping lane' ka lapokogo aser strait nung shishilempaba rong amokmerenba Iran nung rong tila trok tziyim telungi yokogo ta shia liasü. US-i anükba tzi lenmang ajanga shishilempaba rong ana ajanga aoba ang meteta lir.

Ajisüaka Trump-i Tehran den iba rara tatem kati arutsü atema tezüngzüktep ka yanglutettsü asü masü ta reprangtsü mechi iba inyakyim anena atar ta sangdong, koba dang Project Freedom nüngja agütsür lir.

Mongulbarnü social media post ka nung, Pakistan aser danga linüktemi mepishiba, Iran anema iba campaign mapang mitkari takok tulu anguba aser Iran teshimtet lenirtem den 'Complete and Final Agreement' asoshi terenlok tulu aliba mechi iba mera ya agir, ta Trump-i ashi.

US aser Iran tsüngta jembishinü akaba nung Pakistan tetsüngtai ia arur aser linük ana tsüngta yimjung ken o jembiba par linük nung ayongzüka liasü.

Bodhbarnü Pakistan Ato Kilonser Shehbaz Sharif-i Trump dang strait nungi rong tem tanükba agüja anir adoktsü merangba anena atatsü mapang shidak nung sangdongba atema pelar ta shia liasü.

Pakistan aser danga linüktem, talisa Saudi Arabia nungi mepishiba nung Trump-i tashi angaba ajanga region nung yimjung, tashi tait aser akangjungshitepba tetsülen tejakleni aotsü, ta Sharif-i X nung ashi.

"Jembishinü aser tesendaktep tajung ajanga rara nung yimjung pangzüker yanglutsü aser taremzüktep akatsü atema inyakba ajanga nung Pakistan-i bendanga agütsür yarir. Tang ama inyakba ajanga region aser alema oa tesem balala nung teti yimjung nung alitsü tezüngzüktep yanglutettsü onoki kanga imlar."

## Syria nung Hezbollah den sendaka aliba cell ka putetogo

**Damascus, Monupii/May 6**

(Agencies): Tongtibang sorkar ketdangsurtem tepsettsü atema tasa asa aliba Hezbollah den sendaka aliba cell ka nungi züngsemtem puogo, ta Syria nung ketdangsurtemi metetdaksü. Iba taittsüba ya Lebanon nung amendaker aliba telok yagi magizüker.

Syrian Ministry of Interior-i Mongolbar aonung ashiba agi, parnoki mapang ka nung dang Damascus tezülen tesem kar aser Aleppo, Homs, Tartous aser Latakia province tem meita oa liasü.

Ministry-isa, meita aoba mapang Hezbollah den sendaka aliba cell ka puteta adongsatsüogo. Iba cell indang züngsemtem ya Lebanon nung specialised training agiba sülen Syria-i aiba lir, ta ashi.

2024 küm December ita Bashar al-Assad atsüngtokba sülen Syria nung yimsüsür tasentemi linük security raksatsütsü asoshi Hezbollah-i tasa balala asaba putetba sangdonga arudar, koba iba telok yagi magizüker.

Bushisüngdangba sülen tongtibang sorkar ketdangsurtem tepsettsü atema

iba cell yagi tasa asa-a aliba ngutetogo, ta ministry-i ashiba den, parnoki bomb yangludang amshiba oset den RPG launcher tem densema military hadir balala puogo.

Ministry-i temulung melemi bilemer parnok 11 indang noksa lemsatepogo, saka item nisungtem ya koba linük nungi iba indang osang tejangjaba magütsü. Parnokisa tasa asartem rongnung tongtiba-a puogo.

Kasa mapang nung Syrian interior ministry-i sangdongba osang ya shitak masü ta Hezbollah-i shiogo.

"Syria nung Hezbollah pur mali ta aiben shika Syria nung security ketdangsurtemi Hezbollah pur maneni aitsüba ya tashishitsü keta lir," ta Iran-i teyari agütsüba telok yagi ashi.

"Iba ajanga Syria aser Lebanon nung tsüngda mangatettep adokdaksütsü merangertem lir ta angateter," ta kasa sangdong ajanga metetdaksü.

Hezbollah telok ya al-Assad den kanga junga sendaktepa liasü, aser parnoki teyari agütsüba ajanga Syria rara nung al-Assad-i aniba teloki takok ngua aru ta bilemer.

## Japan-i South China Sea leni missile khaketa yok

**Manila, Monupii/May**

(Agencies): Bodhbarnü U.S., Australian, aser Philippine sepaitem den joint maritime exercise ka ayongzüka agiba mapang Japan indang Self-Defense Forces-i Type 88 anti-ship missile khaketa yoka mangatettep adoker aliba South China Sea nung Philippine indang Navy rong tejen ka dak khashia liasü.

Manila aser Tokyo na defence hadirtem shishilembatsü atema sensaksem tenzüker aliba mapang iba drill ya ayongzüka agiogo. Japan-i military hadirtem export asüba nokdang aliba agintsü telemtetba agiba sülen tang linük ana tsüngda shishilembateptsü atema lenmang lapokogo.

Sensaksem nung Philippines dang Abukuma class destroyer aser TC-90 aircraft ayoktsü atema sensaksemba densema lir, ta Japan Defense Minister Shinjiro Koizumi-i ashi.

Missile khaketa yokba ya Philippine Defense Secretary ?Gilberto Teodoro aser Koizumi nati asadangogo aser Philippine tir Ferdinand Marcos Jr-i iba exercise ya Manila nung military headquarters nungi live repranga liasü, ta tir office sangdong ka ajanga metetdaksü.

Philippine military-i ashiba agi, Type 88 volleys ana khaketa yokba sülen minute trok

tsüngda BRP Quezon dak khashia liasü. Northern Philippines nung Paoay tziüküm nungi km 75 shi pilar South China Sea tsütsülen iba rong dak missile ya khalokja liasü.

Philippine Department of National Defense-i ashiba agi, Japan indang Type 88 missile system ya tziüküm nung aliba tesemtem kümzüka ayutsü aser tziyim nung amokmerentem nokdangtsü atema design süa yangluba lir.

Live-fire drill ya Manila aser Washington nati kümshia ayongzüka agiba exercise nung shilem ka lir.

Japan den külemi Canada, Australia, France aser New Zealand nung Balikatan nung tang mezüngbuba denogo aser iba ajanga Manila security partnerships network atsülanga aoba sayur.

May 2 nü Filipino aser America nung sepaitemi Taiwan anasa Batanes province nung anti-ship missile NMESIS tendangogo.

Taküm iba exercise nung sepai 17,000 dak temai shilem agidar, kong Japan nung sepai 1,400 shi aser United State nungi sepai 10,000 shi densema lir.

Manila-i parnok den sendaktepa aliba linüktem den joint military exercise balala ayongzüka agiba ya Beijing-i aija arudar, aser ashiba agi iba ajanga parnok meketa aliba tesem nung tensa mejungi kümdaksür.



## India aser Pak na tsüngda asayamung kecha masayatsü: Sports Ministry



**Monupii/May 6, 2026 (Agencies):** India Sports Ministry-i parnok tamendakdak jangjashia Pakistan den bilateral asayamungtem maneni kecha masayatsü ta metetdaksüogo.

Bodhbarnü National Sports Federations (NSFs), Indian Olympic Association (IOA), aser Sports Authority of India (SAI) dangi yokba shiti nung ministry-i, linük ana tsüngda linük anaprongla nung asayamung kecha masayatsü, saka international asayamungtem nungbo tang ama maneni asayatsü ta shia lir.

"Linük anaprongla nung bilateral sports events dak sendakba nung India team tem Pakistan nung oa masayatsü aser Pakistan team tema India

nung arua asayatsü memelatsü," ta ministry-i ashi. Ajisüaka international asayamung dak sendakba nungbo sorkari ken o jangjashitsüogo.

"India nunger team tem aser kija asyartem Pakistan nungi team aser asyartem asayaba international asayamungtem nung shilem agitsü. Kasaji Pakistan nunger team tem aser asyartem India nung ayongzüka asayaba international asayamungtem nungbo asayadaksütsü," ta kasa sangdong ajanga metetdaksü.

Kiralongrartemi Pahalgam amakba sülen UAE nung Pakistan team dena asayaba Asia Cup nung India asayaba atema aikati aitsüba sülen iba

policy ya benoka liasü.

Sorkari Pakistan nung ayongzüka asayaba dang mesüra multilateral asayamungtem nungbo mejushitsü ta shiogo.

2030 Commonwealth Games aser 2036 Olympic Games ayongzüka asayatsü atema India-i bid asüba mapang ministry-i Olympic Charter nung shinga bendanga mamshitsü shia aliba sülen tashi anga anidaksü nungdakba lemsatepogo.

"International asayamungtem ayongzüka asayatsü asoshi India ya ajaki saklokba tesem ka kümdaksütsü asoshi visa inyakyima tezübaba kümdaksütsü," ta ministry-isa shisem.

## WC nung asayatsü atema Iran-i FIFA nem takhangba kar agütsü

**Monupii/May 6, 2026 (Agencies):** 2026 FIFA World Cup nung Iran team asayatsü asoshi tezüluba nung tenangzüka ka agütsütsü imlar.

Asayamung masaya tsüngda sensaksemtü atema FIFA-i Iranian Football Federation (FFIRI) ya Zurich nung parnok indang headquarters-i jaokogo, aser federation tekolakba Mehdi Taj-i, iba asayamung nung parnok shilem agitsüba ya FIFA tir Gianni Infantino-i tenangzüka agütsüba dak keta lir, ta shiogo.

"Iran team World Cup nung shilem agitsüla ta onoki amanger," ta Taj-i ashi.

"Ajisüaka onok shilem agitsüba ya Infantino den senden amenba mapang tenangzüka agütsüba dak keta lir," ta paisa shisem.

Iran-i parnok indang political aser military institution tem aser talisa Islamic Revolutionary Guard Corps (IRGC) ya asayamung mapang tiluja mamshitsü ta

tenangzüka ka aginer.

"Onok indang armed forces aser talisa Revolutionary Guards tulija amshitsü parnok temeden mali. Iba amala ya atalokra onok team kidangi meyipa aotsü," ta Taj-i ashi.

Taoba hopta Taj aser FFIRI ketdangsurtem Vancouver nung FIFA Congress-i adeni aoba mapang Canada nungi meyipa ao. Canada-i 2024 kum IRGC ya kiralongrar telok ka ta sangdongogo aser iba telok den sendaka alirtem linüki aitsü memelar.

Iba sülen Taj-i iba tajangshiba ya parnok mezüngmeshiba ka ta ashiba den parnok tilutsüba sülen kidangi meyipa aotsü telemteba agi, ta shisem. Iba tatalokba sülen FIFA Secretary-General Mattias Grafstrom-i iba tatalokba atema sasa bilemba lemsatepa FFIRI dangi shiti züluogo aser ken o bentetsü atema May 20 nü Zurich-i jaokogo.

U.S. aser Israel nati Iran amakba ajanga tensa mejungi

kümer aliba mapang United States, Canada, aser Mexico nung asayatsü aliba 2026 World Cup ya asayatsü lir.

FIFA-ibo Iran team iba asayamung nung shilem agitsü ta shia arudar, ajisüaka U.S. Secretary of State Marco Rubio-i, IRGC den sendaka alirtem shinga linüki aitsü memelatsü ta shiogo.

Taj shiba taoba mapang IRGC nung tongtibang lenir ka liasü, pai iba amala tenokdangba agütsüba ajanga Iran team shilem agitsü aliba nung tetsükdaksü adoktsü, ta ashi.

"Onok host ji America masü FIFA lir. Parnoki onok host asütsü agizükra parnoki onok rijutem tiluja mamshitsüla. Ajita mesüra Canada nung ama ataloktsü," ta pai ashi.

World Cup nung India team Group G nung New Zealand, Belgium, aser Egypt den ata lir aser parnok June 15 nü Los Angeles nung New Zealand den mezüngbuba asaya asayatsü.

## IPL final Ahmedabad nung aser Mullanpur o Dharamsala nung playoffs asayatsü

**Monupii/May 6, 2026 (Agencies):** 2026 Indian Premier League final May 31 nü Narendra Modi Stadium, Ahmedabad nung asayatsü. Asayamung playoffs ya May 26 (Qualifier 1), May 27 (Eliminator) aser May 29 (Qualifier 2) nü asayatsü imlar. Playoffs ya Mullanpur aser Dharamsala nung asayatsü.

IPL final Bengaluru nung masü saka Ahmedabad nung asayatsü telemteba agiba ya taoba mapang ama masü, kechiyong taoba mapangtem nungbo final ya reigning champions indang home ground nung asaya aruogo. Taoba mapang ama dang asayara final ya M Chinnaswamy Stadium, Bengaluru nung asayatsüla, koba taoba kum iba asayamung akokba Royal Challengers Bengaluru team indang home ground lir.

"Inyakyim kar asadanger IPL 2026 Playoffs ya takimbo tesem asem nung asayatsü," ta IPL sangdong ka ajanga metetdaksü.

"Final ya Bengaluru nung asayatsü liasü. Ajisüaka local association aser ketdangsurtem takhangba kar BCCI guideline aser protocol den meputepba ajanga final asayatsüba tesem melenshiogo," ta kasa sangdong ajanga shisem.

Chinnaswamy Stadium nung ticket dak sendakba nung tang ken o benjar aliba ajanga Board

of Control for Cricket in India-i final asayatsüba tesem belener ao asütsü ta angateter.

Taoba kuma IPL final ya Kolkata nung Eden Gardens nungi Ahmedabad-i belener ao kechiyong weather forecast majung liasü aser 2026 kum final densema iba ground nung taoba kum pongu tsüngda final pezübuba asayatsü lir.

2024 kum Sunrisers Hyderabad aser Kolkata Knight Riders na final asaya Chennai nung asaya-a liasü.

IPL league round tatembang ka dangi aruba mapang team tenet tashi playoffs atema toktepdar. Taoba kum runners-up Punjab Kings puri point 13 ngua parnok temaba jenjang nung lir aser parnok sülen Royal Challengers Bengaluru, Sunrisers Hyderabad aser Rajasthan Royals lir.

Team pezü-i point teranana ngua kasasa nung lir aser taruba hopta-ang knockout stage-i aitsüpurtem jangja akümtsü.

### IPL 2026 PLAYOFFS

**May 26:** Qualifier 1 at HPCA Stadium, Dharamshala

**May 27:** Eliminator at New International Cricket Stadium, New Chandigarh

**May 29:** Qualifier 2 at New International Cricket Stadium, New Chandigarh

**May 31:** Final at Narendra Modi Stadium, Ahmedabad.

## Arsenal UEFA Champions League final-i iogo

**Monupii/May 6, 2026 (Agencies):** Arsenal pur hopta ka ana tsüngda takok tamakok ajak ajangshia asaya arudar, saka parnok UEFA Champions League akoktsü atema asaya ka dang akoktsü nungdaka kumogo.

Emirates nung Champions League semifinal tanabuba leg nung Atletico Madrid goal ka agi akokba sülen parnok final-i iogo. Asaya nung goal ka ya Bukayo Saka-i idakja liasü.

Metropolitano nung mezüngbuba leg asaya goal kaka agütsür tembangba sülen team ana tsüngda tanabuba leg kanga toktepa asayaogo.

Iba asaya akokba sülen Arsenal pur 2006 kum sülen tang mezüngbuba Champions League final-i iogo. Iba kum parnoki Paris nung FC Barcelona goal 2-1 agi makok. Parnoki tang tashi nung Champions League final khen dang tongteter liasü, aser iba asayamung khen danga koka mali.

1994 Cup Winners' Cup aser 1970 Inter-Cities Fairs Cup akokba dak alaka parnoki Europe nung tongtibang asayamung ka danga koka mali.

Hungary yimtiba Budapest nung parnoki iba asayamung

final kokra iba Arsenal squad ya club puti otsü aitsü. Asayamung mekokaka 2025/26 team yagi taoba mapang Arsenal team kechaia majangzüktetba ajangzüko.

Iba Arsenal team ya Champions League campaign ka nung asaya 14 mesüra iba dang timba nung khen danga tamakok mongi asayaba mezüngbuba team kumogo.

Ano Europe nung team kati danga Champions League mekoki iba asayamung nung asaya timba asaya-a mali.

Kasa mapang nung Arsenal pur Champions League akoktsü timla dang masü saka Premier League title-a abentsü ana nung lir.

Iba hopta tetenzüklen Manchester City pur asaya ka draw asüba sülen Arteta-i aniba team ya jenjang junga kumogo.

Premier League akoktsü atema Arsenal puri West Ham, Burnley, aser Crystal Palace dang akoktsü nungdaka lir. Parnoki kum 22 tashi Premier League ya khen danga mekoki arudar.

Champions League final nung parnok Paris Saint-Germain mesüra Bayern Munich den asayatsü.

## BILEMDANGANG

"Nisung aikati parnoki memetetba nisung puatsü atema parnok ket nung makaba sen entoka parnoki menüngdakba oset alir."